

Inatsisartut Suleriaasianni § 33 naapertorlugu matumani aalajangiiffigisassatut siunnersuut Naalakkersuisut matumuuna saqqummiuppaat:

**Kalaallit Nunaata eqqaani imartani aningaasaqarnikkut immikkut
Oqartussaaffigisani avatangiisit illersorneqarnissaat pillugu inatsisip
allanngortinneqarneranik inatsisissatut siunnersuummik Namminersorlutik
Oqartussat ilaliinissaat pillugu Inatsisartut aalajangiiffigisassaattut siunnersuut.**
(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Tunngavilersuut

Siunnersuut Naalagaaffimmi oqartussaasut Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsisip allanngortinneqarneranik inatsisissatut siunnersuummik Inatsisartut akuersinissaannik qinnuteqarnerannut tunngasuvoq.

Siunnersuut UKA2023-mi suliarineqarpoq (imm. 36), siunnersuullu Inatsisartunit akuerineqarluni. Kingornali inatsisissatut siunnersuummi allannguisoqarpoq Inatsisartunit akuerineqarsimangitsunik.

Inatsisissatut siunnersuut siusinnerusukkut saqqummiunneqartoq pisinnaatitsissummik siammasissumik imaqarpoq, ilaatigut Kalaallit Nunaata eqqaani imartanut aningaasaqarnikkut immikkut oqartussaaffigisat issittortaanni (EEZ) heavy fuel oilimik (HFO) atuinissamut aammalu assartuinissamut inerteqquneqarnermut Danmarkimi oqartussaasut maleruagassanik atuutilersitsinissaannik periarfissiisumik. Naalagaaffimmi oqartussaasut pisinnaatitsissut tamanna atorlugu nalunaarummik atulersitsisimapput, juulip aallaqqaataani 2024-mit heavy fuel oilimik (HFO) atuinissamut aammalu assartuinissamut inerteqquteqartumik.

Inatsisissatut siunnersuutip saqqummiuteqqinneqarneranut pissutaavoq pisinnaatitsissummik aalajangersakkamik siammasereersumik Naalagaaffimmi oqartussaasut annertusaasimanerat, Kalaallit Nunaata eqqaani imartani aningaasaqarnikkut immikkut oqartussaaffigisani umiarsuarnik isaterisarnermut aamma maleruagassanik atuutilersitsisoqarsinnaangorlugu.

Pisinnaatitsissummik aalajangersakkap annertusarneqarnera Naalagaaffimmi oqartussaasunit ingerlanneqarpoq inatsisissatut siunnersuutip siulliup UKA2023-mi Inatsisartunut saqqummiunneqarnerata kingorna. Paatsoortoqarsimanera pissutigalugu inatsisissatut siunnersuutip allanngortinneqarnerata Inatsisartunit akuerineqarnissaa Naalagaaffimmi oqartussaasunit qinnutigineqarsimangilaq. Tamannalu pissutigalugu inatsisissatut siunnersuutip annertusarneqarnera umiarsuarnik isaterisarnermut tunngasoq Inatsisartunit akuerineqarsimangilaq. Taa-maattumik inatsisissatut siunnersuut Inatsisartunut saqqummiuteqqinneqassaaq.

Umiarsuarnik isaterisarneq pillugu maleruagassat Hong Kongimi nunat tamalaat isumaqatigiissutaanneersuupput juunip 26-ani 2025-mit atuutilertussanit. Nunat tamalaat isumaqatigiissutaanni ilaatigut piumasaaqatigineqarpoq umiarsuit 500 bruttotonnage sinnerlugit usitussuseqartut akuutissanut navianartunut umiarsuup atortuiniittunut sananeqaataaniittu-nulluunniit, soorlu asbestimut, saffiugassanut oqimaatsunut aamma akuutissanut ozonimut

akornutaasunut allattorsimaffeqassasut. Pisinnaatitsissut annertusisaq pisariaqarpoq, Hong Kongimi nunani tamalaani isumaqatigiissummut tunngatillugu Kalaallit Nunaannut nunamut akisussaaffeqarfimmut tunuarsimaarfeqarnerup atorunnaarsinneqarnissaa Inatsisartunit 2021-mi ukiakkut ataatsimiinnermi aalajangerneqarmat.

Inatsisissatut siunnersuut Danmarkimi Folketingimit februaarip arferngani 2024-mi akuerineqareerpoq, naak Inatsisartunit akuerineqarnissaa amigaataagaluartoq. Matumani saqqummiuseqqinnermi inatsisissatut siunnersuut allannngortinneqartoq umiarsuarnillu isaterisarnermut maleruagassiornissamut pisinnaatitsissummik nutaamik imaqartoq Inatsisartunit akuerineq-assasoq siunnersuutigineqarpoq. Taamaaliornikkut Hong Kongimi nunani tamalaani isumaqatigiissummi maleruagassat Kalaallit Nunaata eqqaani imartani aningaasaqarnikkut immikkut oqartussaaffigisani naammassineqarsinnaangussapput.

Naalakkersuisut siunnersuummut oqaaseqaataat

Naalagaaffimmi oqartussaasut inatsisissatut siunnersuutaat allannngortinneqartoq Kalaallit Nunaata nunap immikkoortuatut umiarsuarnik isaterisarneq pillugu Hong Kongimi nunani tamalaani isumaqatigiissummut tunuarsimaarfeqarnerata atorunnaarsinneqarneranut atasutut isigineqassaaq, EEZ-imullu atuuttumik umiarsuarnik isaterisarnermut nalunaarutikkut atulersinneqarnissaa naatsorsuutigineqarluni. Naalakkersuisut aamma umiarsuarnik isaterisarneq pillugu nalunaarutissamik suliaqarput, imartanut oqartussaaffigisanut aamma nunamut atuut-tussamik.

Naalagaaffimmi oqartussaasut inatsisissatut siunnersuutaata suliarineqarneranut atatillugu Danmarkimi Kalaallit Nunaannilu oqartussaasut akornanni ingerlaavartumik oqaloqati-giittoqarpoq. Naalagaaffimmilu oqartussaasut ilaatigut neriorsuutigaat Inatsisartut akuersi-tinnagit umiarsuarnik isaterisarneq pillugu maleruagassanik atuutilersitsisoqassanngitsoq.

Siunnersuutip matuma akuerineqarneratigut Kalaallit Nunaata eqqaani imartani aningaasaqarnikkut immikkut oqartussaaffigisani imaani avatangiisit pillugit maleruagassat nutarterneqarnissaat qulakkeerneqassaaq.

Pisortanut aningaasatigut allaffissornikkullu kingunerisassat

Soqanngilaq.

Namminersorluni inuussutissarsiuqarnermut aningaasatigut allaffissornikkullu kingunerisassat

Pisinnaatitsissummik aalajangersakkap annertusineqarnerata imaluunniit EEZ-imut atuuttumik umiarsuarnik isaterisarneq pillugu nalunaarutip atulersinneqarnerata kingunerisaanik Kalaallit Nunaanni namminersorluni inuussutissarsiornermut aningaasatigut allaffissornikkullu kingunerneqarnissaa naatsorsuutigineqanngilaq. Taamaattumik umiarsuit EZZ qimakkaangamikku umiarsuarmi akuutissanut navianartunut takussutissiornissamut piumasaqaatit assingi malittartussaassavaat.

Innuttaasunut aningaasatigut allaffissornikkullu kingunerisassat

Soqanngilaq.

Tusarniaaneq

Inatsisissatut siunnersuut tamanut ammasumik tusarniaassutigineqarpoq, siullermik Danmarkimi kingornalu Kalaallit Nunaanni. Tusarniaanermut akissummik ataatsimik tigusaqartoqarpoq, inatsisissatut siunnersuummut tapersiisumik.